

四庫全書

史部

欽定四庫全書

史部

欽定平定臺灣紀畧卷三十八至四十

內閣中書_臣沈聰覆勘

武英殿纂修中書_臣彭元琬

欽定四庫全書

欽定平定臺灣紀畧卷五十八

九月二十四日戊午孫永清三德同奏言接准督臣

洛調粵西預備官兵三千名赴臺協剿臣三德先

馳抵梧州照料點送所有附近東省官兵即撥五

百名為一起派副將巴爾布帶領前進其餘各起

官兵均依限到梧即分派將弁點送上船銜尾開

行九月初九日已全數出境由廣東封川縣一帶

前進奏入報

聞

二十七日卯辛舒常姜晟同奏言川省派撥屯練降
番二千名赴閩協勦于本月十六十七十九二十
等日所有四起屯練降番挨次行抵漢口鎮其替
換船隻先經照數按起預備差探每起將到臣等
即親至該處督同司道等先為預備隨到隨點看
更換過船將例給供支及加賚餅肉錢文等項按

船散給其領屯兵各起之將備土弁等量給綱疋荷包銀鏢等物當即令其開行前進臣等目擊該官兵等氣象不但整肅安靜實俱踴躍奮興自漢口至黃梅縣出湖北境計程五百六十里順流而下不過三四日臣等添派叅遊等催護前進逐站水台按例應付令藩司陳淮駐黃梅縣照料出境成都將軍鄂輝總兵穆克登阿俱于十九日先後行抵漢陽即日換船督催川兵前進至川省運閘

米二十萬石頭二兩運業經自漢換船開行其三
四運亦現在陸續抵漢陽過載又續辦米三十萬
石同頭運米船據宜昌府稟報已入巴東楚境

同日李慶棠奏言黔省赴閩官兵省城各營于初
八日起程下遊鎮遠等各營官兵均於初九初十
十一等日自營起程上遊之大定等營官兵亦于
初九初十十一等日起程十六日全行經過省城
臣現在親赴沿途催趲並會同提臣保成飛飭領

兵員弁迅速行走毋許片刻遲延約于二十四日
可以全抵古州水次開船前進一路順流直下約三
日即可抵廣西懷遠縣境均奏入

上命軍機大臣傳諭孫士毅李侍堯何裕城孫永清徐
嗣曾曰現在臺灣勦賊仍未能剋期蕝事尚須厚集
兵力以迅奏膚功計福康安此時早經前抵臺灣鹿
仔港督辦一切正須生力之兵調遣會勦逆匪所有
四川屯練降番及貴州廣西之兵務須遄程前進著

傳諭孫士毅何裕城孫永清于沿途地方飭令帶兵
官弁加緊兼程行走愈速愈妙並著李侍堯徐嗣曾
先行預備船隻俟各兵到時即可迅速配渡毋使稍
有遲緩

同日李侍堯奏言十四日接常青來札並將恒瑞
摺稿寄來臣查廈門驛站尚未有恒瑞奏摺過境
想因風水不順吹往別處口岸不能即到臣等謹
將原稿進

呈惟是閔恒瑞摺稿蔡攀龍等抵諸羅後仍未能殺
出隨同進兵之貴林楊起麟等並不知下落是此
次赴援之兵又未得手幸恒瑞先帶兵一千五百
已到鹽水港水路尚可無虞緣經月以來海洋東
風甚大內地船隻不能放洋所派赴援鹽水港之
本省兵三千已開駕一半其續出之一千五百名
到廈門僅遲兩日即為風阻屢出屢回至今尚未
出境俟風勢稍平即催令速發現准孫士毅咨稱

粵西兵三千本月二十以外頭起可以入閩境臣
自當料理令其隨到隨即登舟以資接濟至海蘭
察等日內已陸續到厦福康安兼程行走已過省
城不日亦即可到所有一切事宜臣與之悉心商
酌再行具奏奏入

上命軍機大臣傳諭福康安常青恒瑞李侍堯曰前據
李侍堯奏蔡攀龍等已抵諸羅復又帶兵出城殺賊
而常青柴大紀總未具奏連日盼望軍報甚為焦急

今據李侍堯奏到各情形是此次赴援之兵又未得手貴林楊起麟係隨同蔡攀龍帶兵援應諸羅今蔡攀龍雖經柴大紀接應入城仍未能殺出而貴林楊起麟又無下落自係被賊匪攔截若有意意外之虞豈不可惜恒瑞摺稿又未提及貴林楊起麟下落殊不可解福康安于本月初五日已抵建溪計程早應前抵廈門與李侍堯會晤商辦一切具奏今李侍堯所發之摺係十五日拜發而福康安尚未到彼或係途

中有疾是以行走遲緩但海蘭察等現據李侍堯奏已陸續前抵廈門則福康安亦當相距不遠何以此次李侍堯之摺福康安又並未啓閱豈中途或適相左未經遇見耶以此時情形而論蔡攀龍入城後雖未能得力而恒瑞已帶兵到鹽水港並據恒瑞摺稿內稱已札會普吉保令其派員帶兵三千前赴諸羅接應而普吉保前已具奏留李化龍駐守鹿仔港伊親帶官兵由西螺斗六門前進攻勦此時自必在途

想普吉保接到恒瑞札會自必星赴諸羅策應較之
派員帶兵更為得力看來鹽水港尚可無虞惟恒瑞
摺稿內稱八月二十五六等日新店鹿仔草鹽水港
等處俱有賊匪滋擾民人被賊脅從者甚多賊匪奸
計欲哄誘官兵前進仍將後路截斷應俟恒瑞所帶
兵一千五百名續行到齊將後路分頭嚴防再相機
進剿接應諸羅等語看來鹽水港附近沿海村庄雖
有被賊脅從民人而義民自行果守及請兵救援者

尚復不少可見百姓向義者頗多而從賊之人亦不
過迫于賊勢並非甘心効逆若大兵軍威壯盛得有
勝仗則人心自定較易招徠恒瑞此去如聞蔡攀龍
等殺出將道路廓清伊必膽壯前進今聞蔡攀龍等
又蹈魏大斌覆轍而貴林等尚無下落未免稍存疑
畏是以不敢前進權在鹽水港駐劄轉令普吉保發
兵接應殊不思魏大斌蔡攀龍前抵諸羅時未將鹽
水港一帶後路肅清是以墮賊奸計仍被截斷恒瑞

此時既到鹽水港自應將附近海口及諸羅迤北屯聚賊匪悉力殲除庶官兵前抵諸羅無虞後顧若不先將沿途賊匪剿殺淨盡即使恒瑞能抵諸羅又與蔡攀龍魏大斌無異不過坐糜廩餉于剿賊機宜仍無裨益至福康安此時自早已由蚶江配渡前抵鹿仔港朕為福康安計算該處有新到漳州兵二千又有李化龍帶往粵東兵二千俱係生力之兵又經李侍堯兩次派調閩兵四千名現又有旨催令四川屯

練及廣西貴州兵共七千名星速前進是鹿仔港兵力極為壯盛福康安此時竟當派撥巴圖魯侍衛章京二十人令舒亮帶領前往徐鼎士處若徐鼎士已由大甲溪進兵舒亮等即速往幫同剿賊即徐鼎士尚未進兵亦應令舒亮速往會同攻擊而福康安一面同海蘭察等統領巴圖魯侍衛章京督率大兵以全力往大里杙進剿大里杙該處係賊匪巢穴一聞大兵攻擊賊首等自必回顧諸羅之圍不解而自解

福康安應預先知會柴大紀等如賊匪回救巢穴即令柴大紀恒瑞蔡攀龍等領兵出城由後跟踪追剿而福康安迎頭截殺使其首尾受困自可悉數成擒倘賊匪仍在諸羅不顧巢穴則福康安於掃平大里杙後即回兵移救諸羅賊匪見巢穴已傾自可不戰而潰最為善策此即從前諭旨內所引魏司馬懿欲擒公孫淵先破襄平之計福康安不可不決機制勝至晉吉保如尚在諸羅一帶駐守福康安不妨將晉

吉保撤回鹿仔港與李化龍協同防守福康安竟帶其五千兵進搥大里杙則兵力既加更可鼓勇前進惟在福康安相度機宜斟酌妥辦再柴大紀處于蔡攀龍抵縣後總未據有奏報在恒瑞所駐鹽水港距諸羅甚近着即派委妥幹員弁設法前往諸羅令柴大紀蔡攀龍將該處實在情形及如何籌辦之處詳晰聲敘仍遴委能事員弁設法賫送即行迅速馳奏又前據李侍堯奏官兵援應諸羅貴林楊起麟為首

隊蔡攀龍孫全謀為二隊一路進勦是貴林楊起麟帶兵在前何以恒瑞摺稿內稱蔡攀龍已抵縣城而貴林楊起麟轉無下落殊不可解著福康安查明據實具奏

同日湖北布政使陳淮奏言川省頭二起屯練降番各五百名已于九月初七日入湖北巴東縣境現由宜昌荊州一帶水路赴省其三四起官兵亦接踵而至

臣

自武昌起程迎赴前途查勘水站督

率照料一抵漢口立即更換船隻護送至黃梅縣
出境該處與江西交界臣即駐劄黃梅按起料理
前進再湖北動撥倉穀碾運閩米一十萬石業分
四起全數配船開行選派妥員按起管運出境四
川先運閩省之米二十萬石已陸續運抵漢口料
理換船攢運前進其續運之三十萬石頭幫米二
萬石已於九月初七日入巴東縣境現亦督率沿
途州縣俟其過境妥為護送摧趲務須迅速遄行

所需船隻漢口商販雲集易於雇覓經臣飭令地方官凡遇貨船概不雇用查有卸載之船隨時雇備以足副運送其餘船隻均聽其往來自便貨物流通商民樂業奏入報

聞

二十八日

壬辰

柴大紀奏言七月初四日已剿逆賊

糾集匪夥萬餘復來攻打諸羅東西北三門營盤臣往來督戰官兵義民奮勇迎敵各營盤鎗砲齊

發俱能多中打死賊匪甚多至未刻東西門外賊
匪俱被官兵殺退惟北門賊匪尚冒死冲來隨飛
調遊擊李隆參將潘韜從番社後轉出夾攻鎗砲
打死賊匪約有百餘名趕過牛稠溪復殺死賊數
十人賊始四散逃竄緣田水漲滿鳴金收軍兵民
間有傷亡獲賊旂五桿鳥鎗長刀籐牌等項割取
耳辦賊首生擒賊匪羅藍張本賴衆等三名訊據
賴衆等供稱上月二十八日賊衆來攻諸羅賊目

偽後將軍葉省在北門外與官兵打仗被大砲打傷肚腹至二十九日身死其妻王玉娘散銀糾衆欲來報讐等語初六日又探得逆首林爽文復糾集南路水底蒙等處賊匪約三千餘名合共萬餘欲來侵犯臣陸續招集義民共六千餘名除歸鹿仔草塩水港等處守禦外尚有四千餘名莫不感激踴躍願効死力初七日寅刻賊衆果來環攻四門其勢比前更屬鴟張俱用車輪及大木牌擋我

大砲臣飭令官兵靜以待動俟賊將近齊放大砲
詎賊匪恃有擋砲之具逼近各營盤大砲連發車
輪倒轉打死賊匪無數將大木牌擊碎臣往來督
率官兵義民奮勇力戰自寅至未東南二門賊匪
打死甚多又殺死五六十人賊始退去惟西北二
處賊匪抵死不懼旋退旋來隨令大砲疊轟鎗手
齊出連環進步義民分路夾攻至酉刻打死騎馬
賊一名賊匪約三百餘名賊衆逃散追至五六里

因大雨收軍生擒賊匪柯招林鎮等四名是夜大雨料賊必以我鎗砲難施潛來劫營隨令各義民留駐營盤協同官兵四面埋伏三更果有賊匪數千擁至西門外營內放起火號左右伏兵齊出施放鎗砲接連轟擊打死賊匪無數賊匪自相踐踏死者數十名始行逃去初八日黎明賊復率衆來攻東南西三門營盤臣往來督飭各營官兵施放大砲總以鳥鎗連環進步打死賊匪甚多官兵義

民乘勢爭先殺死賊匪多人至午後東南門外賊已敗走惟西門外賊尚不退戰至未刻打死賊匪百餘名賊始逃竄初九日辰刻東門外萬人塚山突出賊數千與官兵對放鎗砲隨令遊擊林光玉率領兵丁義民極力堵殺又據遊擊李隆報南門外草地尾有賊數千從山仔頂來攻臣隨飛飭叅將潘韜同各義民飛往協勦而耆仔溝北社尾等處亦有賊二三千人來攻西門臣飛往督飭守備

楊鵬連放大砲轟擊飭把總蔡祥等帶兵丁義民
從學舍邊抄出守備曾紹龍親帶官兵義民由番
社內殺出賊匪不及提防被殺二百餘人打死騎
馬賊一名賊始遠竄其東南二處賊匪俱經遊擊
李隆林光玉叅將潘韜等殺退初十日卯刻賊匪
又來環攻其西門外之賊俱帶沾油草把直冲番
社欲圍放火臣督令官兵施放大砲番社內原有
埋伏鎗箭一齊並發打死賊匪數十名賊勢稍怯

即令鎗手向前義民長刀在後追殺斃賊數十名
賊盡棄草把遠逃而東南門外之賊尚與官兵鏖
戰_臣往來兩處督令鎗砲連環轟擊打死賊匪甚
多賊始四散奔逃打裂大砲二門署北路左營守
備李進得外委黃春陽被傷十一日寅刻賊復率
衆環攻各營盤鎗砲齊發官兵義民奮勇力戰自
寅至午東南之賊打死百餘名各自逃竄北門外
之賊被大砲打死數十名亦退惟西門外之賊尚

拚命冲來復用大砲接連轟擊打死賊匪百餘人
官兵義民向前趕殺詎賊衆身藏尖刀二三把回
身擲來兵民間有受傷隨飭義民內牌手盡行抽
出與隊伍牌手一併在前擋其擲刀次以鎗手連
環疊進再以義民長柄刀緊隨一齊奮勇追去斃
賊無數其餘四散奔竄追過三苞竹外將賊蔡燒
燬自初七日起至十一日止共陣亡兵丁林滔等
三十八名義民劉極等十二名又兵丁薛名進等

十二名義民清尾等一百四十八名番民他剌倫等五名被傷獲賊旗竹牌半斬刀長刀等項再連日打仗官兵不暇造飯仍係紳耆鋪戶煮飯送食併挑送涼水官兵義民得免饑渴所有生擒羅藍等七犯隨審明正法再賊匪連日環攻諸羅雖被官兵殺退但糧餉缺乏咨請將軍臣常青添兵應援經三次添兵俱停駐鹿仔草未得前來臣將來諸羅路徑難易賊匪多寡之處繪圖貼說密行劄

知總兵魏大斌等併令預將起程日期先行通知以便帶兵前往接應魏大斌等並無回信茲本月十三日夕刻賊匪六七千復來攻縣東西二門營盤臣督率官兵義民奮勇堵殺至午後賊始退去適遠聞砲聲料係總兵魏大斌等帶兵來縣中途遇賊打仗隨飛飭叅將潘韜遊擊李隆帶領隊伍前往接應臣親帶官兵義民繼進至外三苞竹劉厝庄地方果見官兵被賊圍困即督飭官兵奮勇

向前齊放鎗砲義民併力冲殺打死賊匪數百將
賊殺退接護魏大斌侍衛德成額官保叅將特克
什布及帶兵之副將詹殿擢遊擊田藍玉各官兵
等又叅將張萬魁在外三苞竹田洋墜馬正在危
急義民鄭乃生奮勇救出送到復有台斗坑水堀
頭兩路賊匪趕來臣一面分撥官兵義民引護總
兵魏大斌等官兵進城一面督率官兵分投抵禦
鎗砲齊放又飭官兵義民繞出賊人之後併力夾

攻打斃賊匪數百旋即退散兵民亦有傷亡獲賊
匪大旗烏鎗長柄刀等件臣連日與賊打仗雖大
小鉛子就諸羅鎔鑄尚足敷用而火藥一項自六
月二十日起至今已用去一萬餘觔正苦匱乏今
總魏大斌等帶到之兵藥鉛又復全無兼之糧餉
兩缺愈覺難處現在會商諸羅縣設法備辦以應
急需併咨請將軍臣常青再撥精兵來諸羅應援
再義民鄭乃生能于賊圍中救出叅將張萬魁實

屬勇往即賞給把總頂戴以示鼓勵其官兵義民
搶獲鎗刀器械等項分給兵丁配用

同日恒瑞奏言八月二十八日有賊萬餘將鹿仔
草庄村三面攻擾經遊擊董秉燦劉鉞守備林世
元等帶兵堵禦正在打仗時村內火起村民驚懼
跑逸賊匪趁勢進村官兵不能拒守于是日晚間
盡行退出其被傷及陣亡官兵共有一百數十人
又前此魏大斌蔡攀龍兩次接應官兵雖到諸羅

已傷亡大半賊匪仍行梗阻道路糧餉不能轉運
現在安撫村民盡力防守俟續調官兵到鹿仔港
再行酌量進剿並請將董秉燦降為守備劉鉞降為
都司林世元革去守備仍留軍營効力均奏入

上命軍機大臣傳諭福康安常青恒瑞李侍堯柴大紀
蔡攀龍曰諸羅被賊攻擾柴大紀在彼激勵軍民設
法堵禦并連次勦殺賊匪實屬出力朕既嘉其績復軫
其勞但所奏皆係八月十六以前之事現在蔡攀龍

已抵諸羅縣城柴大紀等作何籌辦及如何打仗殺賊之處尚未據續有奏到柴大紀惟當倍加勉力迅速成功承受恩賞至鹿仔草一帶仍有賊匪梗阻恒瑞雖駐劄鹽水港所帶之兵尚未到齊不能前進未免心存疑懼漫無主見若鹽水港復被賊擾稍有疎失則沿海水路亦致阻隔所關匪細因思鹿仔港距大里杙雖不過數十里但沿路村莊恐有賊匪屯聚官兵即往大里杙攻擊恐賊匪又乘間潛出將後路

攔截則官兵難免返顧之虞不可不慮福康安此時
應探明普吉保如已由西螺進攻斗六門打通道路
直抵諸羅則大局已定固屬甚善福康安即同海蘭
察及巴圖魯侍衛章京等帶領鹿仔港新到之漳州
粵東兵徑搗大里杙賊巢鹿仔港自藍元枚病故後
並無賊匪滋擾該處新到之兵尚未與賊人打仗俱
係生力新兵銳氣方盛正可及鋒而用若此時普吉
保尚未能得手仍在西螺一帶駐劄則徒守無益福

康安竟應將普吉保調回鹿仔港防守現在川省屯練及廣西貴州兵俱有旨催令迅速進行自可陸續前抵該處福康安即帶漳州粵東兵前搥賊巢並知會徐鼎士兩路夾攻若鹿仔港現存之兵尚不敷用或稍待川廣黔省之兵到後再行統領前進而於鹿仔港至大里杙一帶地方仍派巴圖魯侍衛章京等數十人酌帶弁兵沿途分佈堵禦截殺淨盡勿使賊人梗阻道路現在福康安等統領大兵分路進剿原不

難尅期蕝功惟鹿仔草現有被賊滋擾之事誠恐軍
心未免稍餒福康安惟應仰體朕意整頓兵威策勵
將弁以期迅速集事雖係么厝州寇亦不宜冒昧涉
險也臺灣全圖前福康安起身時已繪出一分令其
帶往今再將鹿仔草至大里杙一帶經朕指示之處
另繪一圖發往並路徑地名粘簽註明易於展閱福
康安接奉後更可按圖遵照辦理

上又命軍機大臣傳諭福康安常青柴大紀曰鹿仔草

至大里杙沿途地方所有村莊民人其中幫助官軍
及安分良善者固多而心懷叵測或于官軍過後潛
出滋擾轉為賊用者恐亦不少福康安進勦大里杙
時該處距鹿仔港甚近僅止四十里或尚可酌留兵
丁防範若將來前往諸羅或相距較遠處所設皆處
處留兵守禦則兵力又分于勦捕不能得力著福康
安于經過各莊時務須留心察看密行體訪如係義
勇良善誠實可信者自當妥為撫慰令其自行守護

並可助官兵聲勢倘有心懷反側附從賊黨者一經查出竟應於大兵經過時即將此奸徒強悍者悉行殲戮止留老弱聽其在莊居住庶無後顧之虞福康安當隨處留心慎重妥辦但不可冒昧先露風聲轉堅其從賊死守之心至柴大紀非至萬不得已自斷不肯委城而出若果力有難支不得不率兵突出則該處義民甚多其中如黃奠邦等現經柴大紀搜獲賊匪偽示有必欲甘心之語若柴大紀帶兵遠出此

等義民必致受賊荼毒朕心更為不忍既使助義出力之人無辜受累且恐他處義民聞而生畏阻其踴躍投効之心大有關係著傳諭柴大紀如諸羅已無他慮自應悉力固守以待援應萬一實難守禦必須出城另圖進取之時務將城內義民及其家屬妥為捍衛先行送出然後振旅出城俾該處義民不致失所被賊戕害方為妥善

臣等謹案諸羅被賊圍擾幾及半載義民等竭力

捍禦誓死不易我

皇上當援兵未集之先

勅令柴大紀勿泥城存與存之說並恐大兵遠去義民
等為賊所甘心復

諭令將其家屬護衛先行俾免荼毒仰見

聖主如天之仁所以為百姓策萬全者無微不至宜乎
恩意所孚淪浹肌髓益得收衆志成城之效也

二十九日

癸巳

上命軍機大臣傳諭福康安常青恒瑞李侍堯孫士毅
柴大紀徐嗣曾曰福康安自九月初五日在建溪發
摺後已逾半月計程已應早抵廈門與李侍堯會晤
面商一切乃未據續有奏報自必係福康安途次偶
有疾病行走遲緩而福康安惟恐朕心廕念不肯自
行陳奏又不令李侍堯徐嗣曾具奏皆未可定著李
侍堯徐嗣曾將福康安在途是否曾有疾病及因何
耽延之處速行馳奏又現在臺灣勦捕賊匪調撥廣

東兵已有一萬數千粵東與福建毗連亦係海疆重地沿海口岸甚多存在需兵巡邏防守而臺灣勦賊事務尚未戡功或將來尚不無添調官兵之處閩粵係屬隣省遇有調撥較為近便自應預為籌備此時粵東調赴臺灣之兵甚多該省存兵較少孫士毅此時應于附近潮州一帶地方廣為招募勤加訓練不妨多多益善既可資該省巡防之用設遇有調撥亦可就近派往但須密籌妥辦不可稍涉張皇至粵省

前後調赴臺灣官兵必有子弟人等隨往該兵丁內
有在臺灣病故損失者自尚懸額未補應卽于該兵
丁隨行子弟內揀選補額一體充伍食糧隨營効力
亦可增添兵力着交福康安常青卽行遵照辦理

同日保寧奏言九月初一日起至初七日四起官
兵番練全數自重慶換船進發十二日已全出川
境查勦捕臺灣賊匪現須厚集兵力軍行必須迅
捷再飛咨成都將軍鄂輝及各起領兵鎮將督率

催償兼程前往並咨沿途各省一體督催奏入報
聞

三十日

甲午

上命軍機大臣傳諭福康安常青恒瑞李侍堯晉吉保
曰前據柴大紀奏到搜獲賊匪偽札內有防守海口
要隘及被官兵恥笑等語因思賊人夥黨內既稱被
官兵恥笑自係賊匪抗拒時屢被官兵勦敗心存畏
懼之言其所稱防守海口亦必係慮及將來窮蹙之

時希圖竄逸入海况前據孫士毅奏訪聞賊有暗造船隻之事可見賊人氣餒已預思逃竄將來官兵四路追剿賊匪自必由海口遁逸不可不加意嚴防著福康安常青等務須嚴飭弁兵于沿海各口岸要隘處所梭織往來巡邏稽察毋使賊人搶佔船隻得以逃往洋面致搜捕有稽時日又前據李侍堯奏鹿耳門鹿仔港等處已派撥緦船船隻並撥鎗兵二百名前往協守此項緦船派往駐守之後該二處有無賊

匪在洋面滋擾兵丁等曾否拏獲賊船總未據李侍
堯奏及著該督即將該處情形據實覆奏並飭該官
兵等務須實力巡防毋致稍有疎懈

欽定平定臺灣紀畧卷三十八

欽定四庫全書

欽定平定臺灣紀畧卷三十九

十月初三日

丁酉

浦霖奏言川兵赴閩自湖北荊州

順流前進應由湖南巴陵縣經過

臣

先經飭令地

方官將一切官兵食用薪蔬等物寬為預備隨到

隨即應付不令兵丁一人上岸以免耽延并可無

虞滋事並飭委署岳州府李之栻署岳州城守營

叅將伊靈阿督率文武各員分駐沿江往來照料

茲于九月十七日全數出境成都將軍鄂輝亦于是日督押末起兵船晝夜前進並無停留兵丁等亦極為安靜奏入報

聞

初四日

戌戌

福康安奏言自入閩省以來沿途不見

柴大紀文報知諸羅受困更為危急及閱看恒瑞奏稿所帶赴援之兵于二十五日行至鹽水港不能前進尚未與柴大紀會合而常青株守府城營

盤南路賊匪仍行四出攻擾臣沿途細加探訪雖傳聞之辭不一大約南北兩路官兵僅可支持防守至今尚未得手臣于十七日馳抵廈門晤見李侍堯詢以賊匪情形亦言近日屢接臺灣各官稟報賊勢似更猖獗將各稟與臣閱看內臬司李永祺稟稱府城週圍十里之內村庄盡被脅從不惟諸羅受困即郡城亦在圍中郡城兵丁除撥往諸羅七千名外其餘呈報病故者殆無虛日現在卧病

者尚有一千數百名兵勢日益餒怯南潭賊匪距城甚近其地附近大穆降薦松岡山等庄皆係賊匪聚處此時郡城甚為可慮又永福等稟稱諸羅城西十里地名湯元店賊匪衆多歷次赴援之兵皆係此處被截今蔡攀龍等救援諸羅會同遊擊楊起麟等前進行至該處亦被賊人阻截惟蔡攀龍孫全謀邱能成帶兵七百名到縣其餘多有損失副將貴林遊擊楊起麟等聞已被害而附近鹽

水港之樹林頭鹿仔草新店等處于二十六二十八二十九等日已被賊匪搶佔鹽水庄民人大半從賊各等語臣查各員所稟鹿仔草等處被賊佔據及將弁兵丁損失各情節俱係巡檢邵宗堯稟報之詞或係該員等張大其詞亦未可定必須親至該處目擊情形方可相機籌辦竊思臺灣賊匪原係烏合之衆易聚易散但該將軍等調度失宜官兵多有損失賊勢固結蔓延日肆猖獗而該將

軍等節次奏報之摺僅以支持堵禦情節敷衍塞責而于賊匪出沒之聚實在情形及官兵打仗損失之數並未詳悉陳明一味支吾掩飾以致久未歲功現在臺灣地方據臣所聞自鳳山以至彰化要隘處所多被賊匪佔據道路梗塞近山一帶如布袋尾雙口坑大穆降九芎林頭湖二湖三湖皆係賊巢是以南北兩路賊匪處處相通而官兵各守一方相距遼遠聲勢轉不能聯絡且進兵道路

窄狹數人不能並行賊匪潛伏道旁庄內俟我兵
經過行至半途即突出從中抄截領兵將弁不知
探明路徑設法防備以至累中賊匪狡計即奮勇如蔡
攀龍救援諸羅亦不能全師直抵縣城是其明驗
看來賊匪不過鬼蜮伎倆慣于中途邀截若我兵
探視賊踪所至沿途搜捕連得數次勝仗其技立
窮無如自用兵以來辦理不合機宜益長賊人之
智全郡官弁兵丁俱不免心懷惶懼現在鹿仔草

一帶藍元枚已經病故賊人聞知必致乘虛窺伺該處止有普吉保李化龍在彼臣若遙揣情形指示一切又恐與該處形勢不盡符合惟有速渡鹿仔港立定主見以鎮人心而壯兵威臣今于途次已飛檄各營嚴切曉諭申明軍紀盡改萎靡之習一到鹿仔港即選擇勇往弁兵激勵出力義民相度地勢整兵奮勇前進務將賊匪屯聚相連之處併力截斷痛加剿殺使其首尾不能相顧官兵所

過之地不致旋通旋塞即當酌量情形或帶兵直抵諸羅或進逼大里杙賊巢則諸羅之圍不攻自解要領既得乘勝直前雖賊匪衆多無難尅期殲滅至臣前赴鹿仔港本應由蚶江配渡聞李侍堯所備船隻馬匹帳房等項先已齊集廈門若復調往蚶江轉稽時日廈門至鹿仔港海道本屬相通自應即由廈門前往以期迅速惟現在颶風頻作連日不止茲已于十九日拜摺後登舟即在大擔

門候風俟風信稍順即刻放洋逕渡此時仍聲言由鹿耳門前進臨時再諭知船戶令其前赴鹿仔港使賊匪猝不及防亦聲東擊西之一法

同日李侍堯奏言閩省辦理軍需除節次解往臺灣南北各路軍營一百五十餘萬兩外其內地辦理兵差夫船各價及一切製備軍裝借給官兵俸餉等項支用亦多寧可寬為脩辦懇再撥銀二三百萬兩以資接濟至本省歲需官兵俸餉等項一百四

十餘萬兩藩庫亦屬不敷據布政使覺羅伍拉納
詳請于鹽道庫內撥銀四十萬兩以供支放似亦
應照詳動撥再鹿仔港所運糧餉鉛藥等項本俱
充足今更當源源運送務期寬裕惟是該處糧餉
向來祇係同知等官辦理今將軍叅贊等全向此
路將來續調之川黔兵到來亦俱由此進剿則糧
餉不可無大員經理臣擬即檄臬司李永祺由海
道前赴鹿仔港但據福康安告稱此時尚聲言由

鹿耳門前進

臣俟福康安開洋後再飭知該臬司

前往仍須慎重不可稍露端倪其府城有永福楊廷理

等料理亦可不致有悞惟官兵屢次赴援諸羅之

後該處存兵又稍覺單薄查

臣所派赴援鹽水港

之兵三千名已先有一半放洋其續到之一千五

百名現在總兵鄭國卿帶領尚在廈門守風臣與

福康安面商將此一千五百兵仍赴常青處協助

南路兵力亦並厚集足資剿殺均入奏

上命軍機大臣傳諭福康安常青恒瑞柴大紀李侍堯
孫士毅曰福康安所奏臺灣府城賊匪現在窺伺一
節俱係地方官稟報之詞但前此蔡攀龍帶兵援諸
羅時先據地方官稟報已將道路打通直抵諸羅復
自城內殺出而續據恒瑞李侍堯奏報則蔡攀龍抵
諸羅後仍被賊梗阻道路並未能出城勦殺可見該
處地方官稟報之詞好否皆未必盡係確實惟常青
處兵力雖厚但先後派撥魏大斌蔡攀龍等援應諸

羅已不免分勢而恒瑞又帶兵三千赴鹽水港常青處現存之兵以分而見單所存無幾賊人乘間侵擾亦屬事之所有常青前經具奏親帶官兵往南潭中州等處搜勦賊匪如府城附近賊勢稍增想常青自揣兵力有限不得直前搜捕亦斷不能輕離該處府城從前未添兵以前尚能守護無虞又有常青在彼自當更無他慮總須俟常青等奏到方得的寔看來常青柴大紀兩處局面尚能支持防守所憲官兵或

屢有挫失不免氣餒于勦捕未能得力今福康安即由廈門配渡前赴鹿仔港仍聲言由鹿耳門前進使賊猝不及防所辦甚好其所稱常青等調度失宜官兵多有損失及南北兩路賊匪處處相通而我相距遼遠聲勢不能聯絡各情節實為切中肯綮福康安于抵鹿仔港後振作士氣鎮定人心探視賊踪所至沿途搜捕實為此時要著至賊人狡猾伎倆往往于官兵過後阻截道路今福康安擬將賊匪屯聚相

朕之處併力截斷使其首尾不能相顧是即因賊人之巧計用以攻賊俾官兵所過之地不致旋通旋塞深合機宜此事初起時若早派福康安前往督辦自可早已藏功乃黃仕簡任承恩貽誤於前而常青等又茫無把握以致曠日持久尚未辦理完結朕悔之無及今福康安到彼聲威壯盛又有巴圖魯侍衛章京等百餘人帶領已到蓄銳之兵進剿且續調之屯練二千黔兵二千廣西兵二千約計十月底俱可到

齊此項兵丁內川黔兵省兵最為趨捷臨山陟嶮驍健可用雖廣西之兵稍遜于此二省之兵亦于南方潮溽之地水土相宜尚可期得力又李侍堯派赴鹽水港兵三千名今據奏已先有一半放洋其一千五百名現經總兵鄭國卿帶領候風過渡合之常青恒瑞柴大紀普吉保等所帶之兵統計不下五六萬是先後派撥之兵為數已多加以府城及鹿仔港招集義民自足敷勦捕之用況我朝定鼎之後止用滿洲

勁旅所向克捷無不以少擊衆戡定海內奄有萬方
諒此等么魔草竊即云為數稍多祇不過一時烏合
以現在如許多兵統領進剿豈尚有不敷即云遍地
皆賊斷無須一兵抵一賊之理福康安惟當督率將
弁奮勇前進免圖奏績前曾降旨令李侍堯孫士毅
于福建漳泉及廣東潮州等處添募官兵以備調遣
該督等竟當廣為招募粵東與福建接壤毗連設遇
有調撥可就近派往而附近游手無藉之徒甚多令

其食糧充伍既可安輯地方又可預備調撥福康安
察看情形若剿捕賊匪實有必須再行添調之處閩
省粵東之兵不妨一面奏聞一面即就近撥調以期
應手福康安計出萬全

上天必垂嘉佑惟福康安摺內所稱沿途搜剿一節賊匪
到處屯聚所過村庄民人多被迫脅今福康安統兵
進剿其經過地方固應乘勢剿除不使于官兵過後
潛出滋擾但所過村庄若悉行殲戮恐一處被官兵

勦洗而他處聞風畏懼轉為賊拒敵是驅使從賊轉
堅其助逆之心若不留心防範而于所過村庄聽其
聚處又恐奸猾之徒于官兵過後生心梗阻致為肘
腋之患福康安務須隨時體訪加意密防使良善得
安其心而奸宄無由逞其伎倆此為最要再如鹿仔
草等處本係楊起麟邱能成在彼駐守嗣因調往援
應諸羅致該處兵單為賊所據福康安統兵前進所
過之處其原派駐守官兵不可輕易撤調即鹿仔港

亦應遵照昨降諭旨于普吉保李化龍二人內酌留
一人駐守以免疎虞至京營勁旅朕非靳于調撥惟
念自京至閩道路遼遠即如川黔等省調派之兵到
彼尚須時日若調動京兵更屬緩不濟急兼恐有駭
聽聞且各省官兵到臺灣後尚因彼處氣候水土不
能服習多有染患疾病者若京兵到彼更不相宜即
派往亦恐用非所長不能得力是以不復調遣福康
安意以為何如至貴林楊起麟二人是否實係陣亡

著即行查明速奏

上又命軍機大臣傳諭李侍堯曰前因賊首林爽文糾衆謀逆罪大惡極該犯係漳州人其祖坟自必近在漳州一帶早經降旨令李侍堯密委妥員將林爽文祖坟先行刨挖剝骨揚灰以損賊勢今月餘尚未見該督覆奏著傳諭李侍堯將于何日查明林爽文祖坟處所及如何辦理之處迅速覆奏

上又諭內閣曰成都將軍鄂輝現在帶領四川屯練兵

丁赴臺灣剿捕賊匪鄂輝久歷行陣于軍旅較為諳習亦著授為叅贊協同福康安悉心籌辦進剿以期迅奏膚功

上又諭內閣曰現在臺灣剿捕逆匪尚未竣事所有軍需等項動用較多著該部於鄰近福建各省分酌撥銀三百萬兩令該督撫派委妥員迅速解往閩省備用

同日何裕成奏言川省屯練降番二千名先經副將

那蘇圖帶領頭起五百名于九月十八日抵江西九江府境當即起程前進茲松潘鎮臣穆克登阿帶領二起五百名于二十一日抵九江境即于次早起程前進成都將軍鄂輝帶領三起五百名于二十四日抵境亦于次早起程副將張芝元帶領四起五百名及額外多帶降番三十一名于二十六日抵境亦即于次早起程並由南康南昌饒州廣信等府前進經臣每起于例給口糧鹽菜之外量給食物錢文分別犒勞該

屯番等趕緊行程甚屬踴躍亦極安靜臣仍飛飭
臬司額勒春于南昌省城上船處督率照料並飭
藩司李承鄴于鉛山縣過嶺處境處親為妥協經
理再湖北省協濟閩米十萬石分作四起由江西
五福地方起岸轉運其頭二起米五萬石先已入
境換船前進今三四起米五萬石亦于九月十五十
九等日先後抵江西九江府境臣派員協同地方
官護送備催行抵鄱陽湖口一俟風順立即渡湖

換船前進不致少有遲悞奏入

上命軍機大臣傳諭孫士毅孫永清李慶棠曰廣西貴州兵丁前據孫永清李慶棠奏已于九月初九十六等日全數出境諒內自可陸續趲發已卽經降旨催令遶行現在福康安已抵廈門配渡亟需官兵接濟合力攻勦著沿途各督撫于前項官兵抵境務須妥為照料儻程前進愈速愈妙

初七日

辛丑

福康安海蘭察同奏言登舟數日風信

靡常現在大擔門守候日內若得旁面稍順之風
可以折戢行走即令開駕放洋再臺灣各處義民
隨營打仗接濟諸羅糧食最為急公出力茲賞給
義民頭目官職並將乾隆五十三年應徵錢糧通
行蠲免現已發給廈門道廳等刊刻謄黃送至舟
中一經登岸即于南北兩路普行張挂並一面出
示剴切曉諭被脅民人亦必聞風投出現在調派
漳州兵丁二千名與賊匪同鄉多言其不可深信

然此時祇可分派各營各隊嚴加約束仍不可稍露端倪至義民人數衆多難保無賊人混入其中亦當責成義民頭目實力查察奏入

上命軍機大臣傳諭福康安常青海蘭察李侍堯曰海面九月內風色不正此原不可過於焦急輕易冒險但十月向係平順易渡福康安于九月十九日在廈門登舟候風過渡計此時早交十月想已得有順風久經放洋前抵鹿仔港矣臺灣剿捕賊匪前後派調

官兵不為不多而常青等運籌調度不能得有把握以致東派西撥兵力見單賊勢尚在各路滋擾幸而朕先事預籌早經降旨將四川屯練及貴州廣西兵預為調度此時臺灣各路之兵未免因日久稍疲而新調川黔廣西之兵皆係生力待其接續前到正資剿捕之用此刻雖因守風稍為稽待然俟此兵威壯盛機宜湊合未始非成功先兆福康安于此時轉不必過於焦急輕易涉險也李侍堯派令鄭國鄉帶往

本省兵三千名亦在大擔候風自即與福康安一同
渡洋此內一千五百名前據李侍堯奏擬撥往常青
處此時福康安到鹿仔港後即日相機進剿其鄭國
所帶兵三千名竟可全數俱赴鹿仔港不必撥
往南路更為壯盛再七月間曾據常青奏遊擊黃鳴
鳳帶領弁兵義民在鹿耳門洋面巡緝瞭見賊船八
隻隨率兵民追捕殺賊二十二人餘匪逃竄賊船賊
藥盡被焚燒等語曾諭令常青等于各隘口分派員

弁實力巡查嚴密防範何以前此賊匪潛出滋擾當
被巡緝官兵即時追捕剿殺而近日鹿仔草一帶近
海口岸轉被賊匪肆出騷擾焚搶屯佔並不能隨時
剿捕著福康安到彼後嚴飭沿海各隘口官弁兵丁
等務須梭織巡邏認真查緝毋使賊匪得以乘間滋
擾剽奪船隻至普吉保前奏俟李化龍抵鹿仔港後
即親帶官兵進擊西螺斗六門正欲觀其後效乃距
今已閱兩旬其如何進兵攻擊及西螺一帶曾否打

通道路接應諸羅之處並未據有續奏或又係因風阻亦未可定普吉保在彼帶兵是否實能奮勇出力著福康安秉公查明據實覆奏人才難得福康安亦不必因有前旨預存成見

同日阿桂奏言福康安進攻大里杙不特廓清道路攻圍賊巢須用多兵即留防後路以及沿途護送糧餉火藥等項在在咸資兵力且福康安與海蘭察等久歷戎行聲威素著非常青等可比必得一

臨其地每戰必克所向披靡方足以寒賊膽而整
軍威若急于前建設未能長驅直入途次稍有濡
遲不副衆望所關匪細臺灣節次調往之兵雖已
不少但分路剿捕及派撥防堵勢已見單且其中
亦少可用之兵而鹿仔港原駐兵力又不及府城
至義民熟番等各護其身家大約以之守禦則
可資其力以之攻剿則但能助勢即如剿賊以來
義民鄉勇到處打仗傷亡俱較兵丁甚少于此可

見徐鼎士帶兵不過二千餘名即由大甲溪進剿
恐亦難深恃計福康安到廈門蚶江一帶當在九
月二十左右臺灣每年九月向多颶風難于配渡
若福康安畧需等候放洋則現調之屯練降番與
黔省兵丁隨後可到福康安親帶前往聲勢較壯
若福康安到廈門蚶江一帶即揚帆逕渡似宜就
該處現有兵力先于諸羅鹽水港等處剿殺匪黨
廓清後路俟屯練降番與黔兵到齊兵力稍充整頓

前進時再飭知徐鼎士由大甲溪剋期夾攻庶搗穴擒渠可以得手就臣愚見臺灣現在剿賊必得可用之兵二萬專為搗穴擒渠之用辦理方有把握福康安到彼如原有及現調各兵足敷攻剿自不肯再請添調倘兵力尚不敷用仍須奏調湖廣兵丁或竟于原備楚兵之外尚須續添黔兵數千仰懇

即照所請准其調用並飭令遄進緣臺灣炎熱雨濕官

兵速到總得于春令完事則辦理不至棘手奏入
報

聞

欽定平定臺灣紀畧卷三十九

欽定四庫全書

欽定平定臺灣紀畧卷四十

十月初八日

壬寅

孫士毅奏言委守備沈德清千總

莊大進帶同兵丁三十二名將赴臺兵丁綿衣鞋
袴帳房等項分載兩船運送廈門九月初五日在
粵東澄海縣開行九月十八日接護南澳鎮副將
鄭元好稟稱前赴閩省銅山沿海一帶巡查至虎
仔嶼收泊沈德清等船隻亦收至虎仔嶼告知於

十五日灣泊銅山營仔汎港三更有賊船四隻每隻數十人前來行刦千總莊大進船內裝載鞋褲帳房等項被刦去一百餘簍並失去隨帶兵器數件千總戳記一個因賊多兵少兵丁三名被打落水千總及各兵均各受傷其守備沈德清船內裝載綿衣未曾被刦等因臣查該護鎮鄭元好既在閩省銅山沿海一帶巡哨何至一任盜賊充斥毫無顧忌其銅山營汎是否該護鎮所轄抑另有專

管之員應聽閩省查明叅辦外臣現於粵東境內
各海口一體委員上緊緝嚴密查拏奏入

上命軍機大臣傳諭李侍堯孫士毅徐嗣曾曰鞋褲帳
房等項俱係運送臺灣軍裝物件被刦至一百餘簍
之多看來竟係林爽文夥匪在洋面潛出邀刦不可
不嚴拏究辦此案被刦係在閩省洋面李侍堯自應
飭屬一體嚴拿但該督駐劄廈門辦理軍務照料官
兵配渡事務繁多無暇兼顧徐嗣曾現在省城並無

經辦要件竟着責成該撫督率所屬實力查拏務期
按名弋獲毋使漏網徐嗣曾于臺灣剿捕事務初時尚知
留心隨時陳奏後見賊匪肆擾日久一時未能辦結
未免心存畏難轉似置身局外緘默不語若與已無
干者徐嗣曾係本省巡撫何得漠不相關若此着傳
旨嚴行申飭

同日保成奏言黔省頭起官兵距古州水次較近
是以咨會古州鎮總兵馬詔蛟即將頭起官兵會

同貴東道尼堪富什渾先行點驗開行總兵馬詔
蛟親至丙妹照料嗣臣趕赴古州即將二起官兵
查點開行隨親督前抵丙妹撫臣李慶榮於遵義
大定平遠黔西官兵過省亦即親赴沿途督催鉛
彈等項俱加倍帶往以資備用奏入報

聞

初九日
癸卯孫士毅奏言黔兵赴閩計程雖遠而自
貴州一帶至廣西梧州府均係溪河急水順流而

下無需多日其自梧州至廣東省城水勢亦順不致稽遲唯自廣州至惠州老龍地方逆水居多自老龍過山之後如遇溪河水勢不致過淺亦止數日可到潮州查廣西柳州以上提臣三德在彼督催撫臣孫永清現駐梧州照料其入粵東境後撫臣圖薩布提臣高瑑於廣惠兩處上緊催趲其自老龍過山青溪下船至潮臣妥為料理中間復派委文武大員分段催查務期加緊進行斷不令稍

有遲滯至粵西兵三千分作六起其頭起五百名
即日可到黃岡點送入閩其餘五起因營分較遠
於九月初十日以前由梧州全數起程約計月盡
月初亦由黃岡全數出境奏入報

聞

十四日申恒瑞奏言鹽水港附近民人多有從賊
九月初四日有賊匪二三千猝至經恒瑞督令儘
森保屢次堵禦初五日早又有賊萬餘前來滋擾

恒瑞督率富克精額奮力勦殺賊匪人數衆多官兵不能抵禦富克精額被砲打傷陣亡恒瑞欲進不能即欲棄鹽水港退回常青處亦不能達現在續到兵五百名唯有志力固守鹽水港奏入

上命軍機大臣傳諭福康安常青海蘭察恒瑞李侍堯孫士毅柴大紀曰該處賊勢尚在猖獗恒瑞兵力有限未免進退掣肘幸所帶之兵又續到五百名可資接應恒瑞此時亦不必過于焦急唯當在鹽水港志

力固守以待福康安到若賊匪衆多勢難守禦不妨
竟棄鹽水港回至常青處再圖進取亦是一策但用
兵之道以攻擊為先著堵禦為後著今官兵所到轉
被賊人攻擾我兵日以抵禦為事是官兵祇辦接應
著著落後而賊人轉得占先客主之勢豈不倒置恒
瑞此時既不能帶兵前抵諸羅又不能回至府城亦
斷無在彼株守之理況恒瑞在彼賊匪不時滋擾仍
須堵禦勦殺不得休息與其賊來始應何若偵探附

近賊匪何處卑弱有隙可乘即帶兵直前攻勦使賊人救應不暇以成反客為主之勢豈不甚善恒瑞當察看光景酌量妥辦亦不必過於拘泥遵旨也至福康安自九月二十四日在大擔門發摺後迄今未據續有奏報前於陸辭時曾令到廈門後察看情形如臺灣府城及諸羅設有疎虞福康安應俟添調官兵到齊再行放洋前進計此時福康安自早得有順風徑渡鹿仔港但現在鹽水港有賊滋擾恒瑞勢不能

支倘此旨到日福康安尚在守風待渡竟當俟川黔
等省官兵到齊再行開駕若已得風配渡前抵鹿仔
港不妨稍為等候俟川黔粵西官兵陸續到彼再行
統領進剿或先赴鹽水港一帶勦殺賊匪援應恒瑞
或徑由鹿仔港直攻大里杙賊庄使賊人迴顧巢穴
前後牽綴則鹽水港等處賊匪自必紛紛解散其圍
不攻自解福康安唯當審度機宜不可畏難亦不可
冒險輕進總以持重為要至福建廣東二省召募新

兵未經訓練若即用以剿賊難期得力著傳諭李侍
堯孫士毅如遇福康安續有添調之處先將各營練
習之兵派令前往其新募之兵留於該省巡查防守
仍一面督飭將弁上緊訓練務期精熟可用庶於戰
守均為有益又徐鼎士處未據續有奏報就目下情
形而論如賊匪盡往南路大里杙賊庄祇係家屬老
弱則徐鼎士自應由大甲溪乘虛進搗賊巢以分賊
勢若北路賊匪屯聚尚多徐鼎士且勿輕進福康安

到鹿仔港後距彼更近自悉該處確信其應如何籌辦之處即當檄知徐昂士遵照辦理

上又命軍機大臣傳諭李侍堯舒常俞金鰲何裕城浦霖曰前經降旨令浦霖於湖南挑選兵二千名以備徵調自己預為挑脩今臺灣勦捕逆匪尚未戡事現須添兵協勦該省兵丁從前調赴金川軍營於馳陟山險較為便捷今調往臺灣助勦自更得力著舒常浦霖即將挑脩兵二千名派鎮箏鎮總兵尹德禧為

總統並著於副將內曾經身歷行陣者酌派一二員
隨同帶兵前往亦照運米路徑由江西一路迅速赴
閩聽候福康安調用所有軍裝火藥等項俱著妥協
備帶勿致稍有缺乏至湖南鳳凰廳地方前因苗匪
滋事甫經該鎮尹德禧搜捕淨盡該處係苗疆緊要
必須大員在彼駐劄以資彈壓著俞金鰲即行前往
該處駐劄兼理總兵印務並著何裕城於兵丁抵境
時妥為料理償程前進

十五日己酉

上命軍機大臣傳諭福康安常青海蘭察恒瑞李侍堯
曰福康安統兵進勦所帶官兵多係派調勁旅其閩
省本地兵丁屢經挫失自不能如川黔兵丁之得力
但現在臺灣統兵大員內如蔡攀龍等即籍隸閩省
其餘偏裨千把籍隸本省者諒復不少福康安仍當
加以策勉鼓勵俾伊等各思振奮勉圖出力不可因
現帶巴圖魯侍衛章京等皆驍勇絕倫所調各兵俱

係生力可恃遂置閩省官兵於不齒致阻伊等効用之心況現在各省調往兵力雖多於該處路徑民情未能熟悉亦須本省兵丁為之向導福康安務須隨時留意於閩省將弁兵丁中視其出力者鼓勵數人以作其氣而收其用不可稍存岐視也再前據常青等奏官兵與賊打仗屢因遇兩路窄不能擺列隊伍但我兵因路窄難行不能整隊豈賊人獨能悉衆全來坦行無阻且我兵因雨水泥濘難以前進何以賊

衆獨不避雨水泥濘時出滋擾殊不可解福康安到
彼詳悉查明該處實在情形悉心籌畫務出萬全

臣等謹按閩省兵丁當屢經挫失之後其氣已餒
我

皇上特簡巴圖魯侍衛章京等及調集川黔勁旅皆驍
勇絕倫可期迅速集事尚

垂念閩省弁兵執爰隨行不肯稍存岐視以阻其効用
之心特

命於將弁兵丁內視有出力者錄用數人以作其氣俾得人人自効踴躍爭先斯真天地之量而為鼓勵人才之極則歟

十六日

庚戌

福康安奏言

臣

此次由鹿仔港進剿必

須南北兩路併力攻圍使賊匪處處防備疲於奔命賊勢既分軍威壯盛不難一鼓殲擒現已繕就咨文俟放洋時差人乘坐哨船知會常青恒瑞柴大紀蔡攀龍等約計

臣

到鹿仔港之時各路大舉

進攻鹿仔港大兵即可垂機迅發直抵諸羅將沿
途賊匪痛加剿殺一面撫諭附近被脅民人令其
各保村庄殺賊自効不必零星派撥逐處留兵道
路自無虞梗阻中路既通聲勢益加聯絡然後整
兵進逼大里杙約會淡水官兵由烏日庄夾攻另
派巴圖魯侍衛數員帶兵在牛罵快官等庄杜其
奔竄之路巢穴既傾南路賊勢益孤殲擒更易為
力臣遙揣情形似應如此辦理到彼後如有應行

佈置之處再當相機妥辦

同日李侍堯奏言閩省駐防滿兵除恒瑞帶領一千赴臺郡外尚有一千五百餘名省城地方亦屬緊要若分撥八百名來駐廈門亦足資彈壓隨飛移副都統鄂岳令其如數調派並明諭各兵以將軍現赴臺灣恐將來或需派撥是以先調至廈門預備至廈後仍飭隨時操演既不稍露端倪亦已足壯聲勢至將軍福康安既赴鹿仔港將來解送

要犯或由蚶江入口該處附近泉州有陸路提標
兵自足彈壓可毋庸分撥滿兵駐劄其漳州一帶
地方尤當靜鎮是以臣諸事只照常辦理不露形
迹再密飭平和縣查訪林興文祖坟據稟林姓各
支多者千餘丁少亦數百丁現在進士林屏南稱
康熙年間有林恪者隻身渡臺營生後即家於大
里代乾隆四十年屏南之堂姪林任觀往臺販易
寓大墩林訪家曾有大里代人林興年約二十以

內常來閒遊詢係林恪之孫現在造逆之林奕文
或即是此人但事隔多年彼此不通信息是否的
係此人不能知其確寔等語查漳泉土風往往人
名有兩字者只呼一字以便稱謂今林任觀所遇
之林奕既居大里杙當即係現在之逆匪林奕文
則伊祖林恪以上墳墓即應刨掘但據林任觀所
供林恪之孫與現在逆匪是一是二尚未有的據
該姓支族甚多方且各懷畏懼未便因疑似之間

遽行辦理恐遂致驚疑不安容再行密訪務得確
切根據辦理均奏入

上命軍機大臣傳諭福康安常青海蘭察恒瑞柴大紀
蔡攀龍李侍堯曰福康安所奏籌辦勦捕事宜與朕
節次所降諭旨雖有大同小異然已俱得領要現在
添調川省屯練兵不過七八日即可前抵廈門若福
康安在大擔門守風尚須數日放洋則此項兵丁當
已陸續到彼福康安即可帶領一同渡洋即福康安

已得順風先行開駕而屯練兵隨後配渡計其前抵
鹿仔港亦不過於福康安到後一二日即可到齊其
貴州廣西兵亦當接續全到且福康安前此原請添
調四川湖南貴州兵各二千今湖北之兵雖因路遠
未經調發但朕已預為籌及派調廣西兵三千現又
添派湖南兵二千而川黔之兵於福康安未經奏調
之先亦俱預為調派此時俱可絡繹前抵該處正資
進勦何慮不所向克捷耶唯恒瑞在鹽水港有被賊

滋擾之信該叅贊前日奏到之摺係由廣東轉達福康安未經啟閱自尚未得信已降旨詳諭一切就此時情形而論自先以援救諸羅為要福康安到鹿仔港後等候川黔廣西兵齊到即直抵諸羅柴大紀蔡攀龍在彼日久于該處情形自為熟悉福康安當與之悉心籌畫至臺灣府城現有常青在彼看來雖未能進取而自守尚屬有餘即使府城守禦難支或竟有疎虞之事亦不難再為收復福康安不必因身當

重寄不能為郡城保全即為有負任使心懷疑慮以致顧此瞻彼轉不能併力一處決機制勝朕亦不怪福康安之不救也所帶巴圖魯侍衛章京等皆係久經行陣于行軍機要皆能熟悉統兵進剿時其旁路後路或有賊匪潛出滋擾伊等自能隨時察看預行防範不致墮賊狡計至林奕文祖墳未得確據自未便因疑似之間概行刨挖轉致林姓支族聞信驚疑應俟查有確切根據再行辦理即使一時未能查出

亦無甚關係不妨稍從緩辦

同日何裕城奏言四川屯練降番兵二千三十一名先於九月二十六日全抵江西九江府境嗣接奉

諭旨飭令加緊兼程行走又飛飭各地方官并添派文武大員分布各站節節催催而該官兵等亦各踴躍爭先由南康南昌饒州廣信等府行抵河口鎮經藩司李承鄴率同府縣等在彼經理分起過鉛

山縣之分水嶺至初八日全抵閩省之崇安縣迅
速前進奏入報

聞

十七日

辛亥

孫士毅奏言前因諸羅急需應援即一

面知會粵西兵起程來潮一面於粵東再奏調一
千名實屬失當至粵西兵三千于十月初四日全
數照料入閩黔兵二千名計日應抵粵東境內奏
入

上命軍機大臣傳諭福康安常青李侍堯孫士毅徐嗣
曾曰今臺灣勦捕賊匪尚未能剋期竣事正需兵力
則孫士毅預行派撥以聽調遣殊為得用甚資其力
何必引以為罪耶此時屯練兵二千已抵該處粵西
兵三千亦已早抵廈門合之鄭國鄉候風待渡之兵
又有八千生力雄兵加以鹿仔港原有之漳州兵二
千廣東兵三千以及義民番社而以巴圖魯侍衛章
京等分領進勦何向不克但恐將來大功垂成賊匪

勢窮力絀之時此輩狡猾性成斷不肯束手待斃或思由海道搶船避竄笨港鹽水港鹿仔草一帶俱曾被賊匪焚搶此等處均係通海口岸將來賊匪避竄時其大里杙巢穴留存家屬甚多賊人顧戀家室自必思搶船隻同載逃逸若逃往洋面則大海廣濶踪跡匪易豈有福康安亦駕船追捕之理福康安等務須預行留心今兵力既多如沿海口岸一經將賊殺散即揀派水陸弁兵嚴行看守並留一二十大員往來

稽察勿被賊人搶佔若有嘯販船隻亦當全行調開
勿令近岸其運載軍需兵米等項船隻於到後即令
原船仍回內地使賊人無船可奪絕其逃竄入海之
路方為妥善再漳泉各屬向藉臺灣運米接濟今臺
灣被賊滋擾雖米石不能源源運送但該撫現稱內
運無多則是臺灣地方小民尚能耕種有米運至內
地且昨據福康安奏常青在府城與賊打仗情形其
信息即係得之船戶可見該處商販雖少尚有船隻

往來其臺灣產米是否常有運送內地者為數約計若干現在臺灣南北兩路何處尚照常耕種並著福康安李侍堯於便中訪查據實具奏

十九日

癸丑

上命軍機大臣傳諭福康安李侍堯曰臺灣地方奸民糾衆械鬪之事非止一次皆由該處多係漳泉二郡及廣東民人在彼居住而漳泉兩郡民人素有嫌隙及與廣東民人彼此不睦其里居田土互相錯處往

往紛爭構釁械鬪滋事而地方官並不實力查辦惟
思將就完案以致奸民無所儆畏因而釀成事體此
次林典文等倡亂不法劫縣戕官亦即因糾衆昌會
而起今福康安等統領大兵鼓勇進勦自可剋期蕺
事惟該處刁民惡習相沿已久若將來撤兵之後未
免故習復萌辦理匪易現經此番大加懲創不可不
悉心籌辦妥為經理以期一勞永逸因思廣東漳泉
三處民人互相構釁若能令其彼此分處各不相涉

自屬甚善但伊等在彼居處多年各有田產安土重遷一時概令離折勢有所難將來賊匪蕩平後福康安應酌量情形設法妥辦如義民內住居山猪毛廣東莊者久經官給懷忠里効忠里匾額該處義民最為奮勇急公自應令其照舊安居各守本業此外各處義民實在隨同官兵打仗殺賊者既經奮勉出力豈可轉令遷徙失其世業若賊匪莊業例應入官當召募別處良善之民居處至各近處村莊民人雖無

從逆實跡而與賊匪同住一莊心持兩端者究不可
信或起此兵威將該處村莊民人酌為遷徙其籍貫
分隸廣東漳泉者令其各為一莊俾相離較遠以杜
爭端至臺灣府城為五方雜處之區自難逐一清釐
轉滋煩擾況鎮道大員俱駐府城原可隨時彈壓無
虞滋事則不必辦及至臺灣南北各處村莊多被賊
焚燬民人俱遭戕害並賊人頭目及被賊脅從之衆
所遺田土房產既未便仍撥給漳泉之民令其徒享

利益且恐遊手無藉之徒從而聚處又致滋事自應
將其田產查明入官另行分撥因念該處熟番向化
日久此次逆匪滋事熟番並無從賊者且淡水等處
現在招集番勇甚多莫若將此項入官田產如四川
屯練之例即給與熟番耕種按則陞科令其安居管
業自為守護既可以示綏戢又可招撫生番豈不一
舉兩得再諸羅彰化等處地方遼濶亦須酌量添設
兵丁以資防禦該處止設知縣一員恐職分較小不

能彈壓或應酌添丞倅將弁在該處駐劄更為有益
著福康安等歸入善後事宜酌辦不必過於拘泥將
來應行籌辦之事甚多若令李侍堯渡洋前往辦理
恐內地乏人而常青於此等要務未經諳練恐亦不
能籌辦裕如福康安既遠涉重洋於該處整頓地方
戡暴安良一切善後事宜正應乘此大兵得勝之後
妥為區畫不必急於回京至海蘭察及巴圖魯侍衛
章京等事竣後自應令其先回不妨酌留數人以資

臂指其閩浙駐防滿兵亦應令其各回本處惟屯練
黔兵既經遠調到彼將來辦理善後事宜或有應須
兵力鎮撫之處亦不妨暫留該處於諸事辦完後應撤回
時再行撤回也

二十日

甲寅

徐嗣曾奏言四川屯練降番二千名調

赴來閩二起兵五百名於初四日入境其頭起兵
已於今日到省先准督臣咨會調撥駐防滿兵駐
劄廈門脩調經酌派八百名分起前往臣與副都

統臣鄂岳商同料理趲川兵未到之時先令滿兵
兩起於初八初十日起身此時川兵已到應先儘
該屯練等逐起過竣後再遣後起滿州前進臣親
赴沿途照料彈壓火藥鉛彈均已備貯泉廈兩處
經臣酌定川兵由蚶江配渡赴鹿仔港已飭總辦
局司道於泉州存貯軍火內就近按數撥給以資
帶往至廣西兵三千名據報三四起已抵廈門貴
州兵二千名計已可抵粵境俟各兵到時即可迅

速配渡奏入報

聞

二十一日^卯孫永清三德同奏言黔省官兵二千名分四起行走頭起官兵於九月二十一日入粵西之梅寨界第二三四起俱間日前來自梅寨至蒼梧出境共水程一千八百餘里每多灘淺難行之處先期飭令各地方官多備人夫在灘伺候兵船一到立即拉送毋許片刻停留並飭沿途督護

各員弁加緊嚴催俾各起接續行走茲於十月初
三日至初六日四起兵船已全數出境入廣東封
川縣界交明廣東道府員弁押護前進其統領各
兵之總兵許世亨并各將弁均能約束兵丁安靜
守法並無生事滋擾之處奏入

上命軍機大臣傳諭福康安李侍堯曰現在川黔廣西
等省兵丁即日陸續前抵鹿仔港伊等遠涉數省行
走奮勉安靜自應酌加獎賞以示鼓勵此內屯練兵

丁屢經調派素為得力但此次甫經新到尚未與賊打仗獨著勞績既未便先加恩賞轉使他省調撥之兵不無缺望且臺灣節次所調粵東浙江及閩省滿漢官兵甚多久經在彼防守堵勦其中傷亡病故及疲弱不能得力者一時亦難分晰查明普行給賞自應核其功過分別賞罰用示勸懲著福康安到彼後於打仗時務須隨時留心查察至新舊派調各兵有打仗出力者亦有怯懦不前者福康安於進勦時應

將各該省中奮勉驍健之兵臨時查明酌加賞賚庶出力者倍加感奮而怯懦者亦知所激勵爭先効用於勦捕機宜方可收臂指之效

二十三日丁李侍堯奏言九月以來海風連作臺灣久無文報本月初九日始接同知吳元琪九月初六日來稟內稱初一日柴大紀有信至府城稱蔡攀龍等援兵惟蔡攀龍孫全謀帶兵七八百名及運送糧餉之義民三千名到諸羅其貴林楊起

麟杭富俱在正音莊陣亡賊在諸羅城十數里外
周圍邀截使道路不通米糧不入現在米價甚貴
且無買處又聞近縣各莊田禾正熟賊與莊民分
收運歸斗六門官兵常出城截用似尚可支持恒
瑞在鹽水港連日打仗常青又添派梁朝桂謝廷
選帶兵一千前往應援等語是諸羅仍未解圍而
鹽水港又多賊匪滋擾梁朝桂等到彼雖可增助
兵力萬一賊益鴟張將鹽水港水口截斷則恒瑞

等進退兩難或有疎失益不成事體是以臣飛札
常青速派水師烏鎗兵數百名駕船數十號往鹽
水港倘賊由水路來擾即行截殺務當保住水口
兼可作萬一退步之用臣因風帆不順特令廈防
廳選募舵工水手將此信冒險折餞前往但未知
是否必能迅速送到至粵西兵三千現已到齊登
舟緣東風甚大不能放洋福康安等亦尚在大擔
候風川省屯練本月初二日頭起兵亦已入閩境

此項兵係從江西取道省城而來應即從蚶江配
渡其船隻亦已預脩妥當俟將到時臣即前往蚶
江料理貴州兵聞已在途想亦迅速可到福康安
等一得順風自當即行開駕

同日普吉保奏言

臣

帶領官兵於九月初六日由

大突溪前往笨港分路勦捕留遊擊葉有光帶兵
八百名防守糧道後路十三日行抵麥子藁有賊
衆數千苛派良民銀米民苦不能應賊剋期次日

燒莊百姓驚惶無措適官兵踵至賊衆奔逸百姓
懼聲動地是日劄營該處仍一面分兵偵探追逐
十五日劄營元長莊離笨港八里密探賊匪均屯
集笨港及前途一帶村莊至夜賊匪暗放火號繼
以砲聲并聞諸羅一帶砲聲徹夜不絕臣當飭將
弁嚴為戒備四鼓將兵分作三隊臣帶領都司馬
元勳由中路直衝賊巢遊擊海亮由西路夾攻護
副將卓靈阿為之接應叅將張朝龍帶領守備宋

欽定四庫全書

欽定平定回疆方略
卷四十

國典署守備沈勇雲從東路橫衝賊衆蜂擁迎敵
臣督率官兵奮勇攻殺鎗砲并施打死賊匪數百
人生擒賊夥楊意蘓媽張固三名審明正法獲器
械三十餘件鞭砲二門米穀薯乾約計百餘石當
分散出力各官兵鄉勇焚燒坂頭厝等賊莊七處
火烟起後諸羅砲聲亦遂不聞查遊擊海亮奮力
督兵復用鎗砲打斃逃散賊匪數人正在收軍據
報有賊匪數百人乘大路前進由崙仔頂一路來

犯大營經署同知黃嘉訓督率鄉勇會同遊擊夏
承熙帶領官兵奮勇堵禦殺賊十餘人當將崙仔
頂賊莊燒燬賊衆退散查笨港地方分南北二港
離諸羅二十餘里離鹽水港三十里離海口三十
里自五月失陷後北港竟成片土南港一帶搭蓋
草寮約計二百餘間悉係賊巢賊匪得以肆行無
忌今頓遭焚殺賊衆未必不為喪膽若徑乘勢直
追至諸羅似覺便捷第恐賊匪詭計多端一俟我

兵前進在後繞襲阻隔糧路貽害非輕故仍劄住
元長莊并可以覘賊匪動靜臣一面親督官兵焚
燒一路賊庄痛加勦殺廓清後路一面密遣安人
移咨叅贊臣恒瑞柴大紀訂期三路會合併力夾
攻均奏入

上命軍機大臣傳諭福康安常青李侍堯恒瑞柴大紀
普吉保曰笨港離諸羅止二十餘里離鹽水港亦止
三十里該處經普吉保帶兵收復與諸羅密邇聲息

相聞是諸羅縣城儘可無慮而鹽水港亦距笨港甚近恒瑞處有續到之閩兵一千五百名又經常青派令梁朝柱等帶兵一千名前往援應則鹽水港一路軍勢亦已大振至常青處既能分兵援應鹽水港看來府城自必防守裕如計福康安此時諒已順風前抵鹿仔港其四川廣西兵自己與福康安先後放洋福康安統領多兵及巴圖魯侍衛章京等前往督勦又經笨港收復之後軍聲倍振惟當督率將弁相機

進勦再該處民人被賊匪勒索銀米焚燒住莊不堪其苦一聞官兵到彼喜獲更生可見賊匪經過地方其附從民人本非甘心從賊特因賊匪逼迫無奈聽從即如麥仔藦地方幸官兵前往該處民人得所倚仗否則必至被賊脅從是前此業經從賊民人其中為賊所迫勉強附從者自復不少福康安此時尤應將安分良民妥為撫慰安戢即已經從賊者亦應設法招徠分別辦理不可因已從賊概予殲除轉致阻

其自新之路堅其助逆之心此為最要其貴林所遺
溫州鎮總兵員缺著福康安於帶兵勇往之副將中
如徐鼎士謝廷選並此外奮勇出力者保舉一員奏
明陞補又遊擊海亮署同知黃嘉訓督率兵民鼓勇
殺賊均屬奮勉亦著福康安查明酌量陞用以示獎
勵再朕恭閱雍正年間


實錄舊例閩粵民人往臺灣耕種者所有妻眷一概不許
攜帶止許隻身居住臺灣而全家仍住本籍嗣經高

其倬疏請將在臺灣墾田耕種及有房屋民人准其搬眷居住經九卿議駁自因臺灣係海洋重地是以不令內地民人挈眷前往今臺灣民人俱有家屬與前定之例不符其准令攜帶眷屬起於何時著福康安李侍堯查明具奏即如現在林爽文等糾衆滋事設其家屬俱在內地賊首等自必有所牽顧何致敢於肆逆若此是臺灣民人禁止搬眷居住未必非杜漸防微之一法將來事定後應如何趁此兵威酌定

章程妥協辦理抑或從來已久有所不能之處並著李侍堯歸入善後事宜一併妥議

上又諭內閣曰貴林楊起麟同都司杭富因勦捕賊匪臨陣捐軀殊屬可憫貴林著照總兵例議卹楊起麟前在鹽水港一帶堵禦防守尤為出力著加等照副將之例議卹其都司杭富亦著照例議卹以示憫恤上又諭內閣曰臺灣逆匪林爽文等糾衆不法肆行滋擾搶佔村莊實為罪大惡極今普吉保督率將弁兵

丁由大突溪一路偵探賊踪奮勇勦殺焚燬賊藁生擒賊夥奪獲器械銀米甚多收復笨港實為出力可嘉普吉保著交部議叙出力兵弁著福康安查明咨部一體議賞



欽定平定臺灣紀畧卷四十